

- 25 Er iz fásto gihíaz ioh iz óuh ni firlíaz:  
 thárazua er húgita ioh ál ouh so gifrúmita.  
 Sie tháhtun thes gifúares sid tho frámmortes:  
 uuas ér ouh in ther fári, ther líut tharmít ni uuari.

24. IX. Venit autem dies azimorum in qua necesse erat occidi pascha.

- Gistúant thera zíti guati, thaz man ópphoroti  
 ioh man zi thíu gisazi, thaz lamp thes náhtes azi.  
 Tho sant er Pétrusan sár, Iohánnem ouh tharmíti in uuar,  
 gibót, thaz sies gízilotin, thie óstoron in gígárotin.  
 5 Bigondun sie ántuurten: 'uuara múgun uuir unsih uuénten,  
 thaz uuir zi thiú gígángen, uuir súliches bigínnen?  
 Uuir ni eígun sár, theist es méist, húses uuíht, so thu uuéist,  
 noh uuíht sélidono, thaz uuir iz gimáchon scóno.'  
 'Thes ni brístit', quad er zi ín, 'fáret in thia burg ín:  
 10 uns dúat ein man gílári, líhít sinan sólári.'  
 Sin iagiuuedar zílota, ioh fúntun al so er ságeta:  
 ther man bisúorgeta tház ioh léh thaz gádum gárauuz.  
 Iz uuas gáro zíoro gistréuuitero stúolo,  
 mit réinidu ál so filu frámm, so géstin súlichen gízám.  
 15 Íltun sie tho hártó sár sines thífonostes thár,  
 thes ziloton se io thuruh nótt: sie hogtun gérho, uuio er gibót.  
 So sie giríhtun allaz tház ioh er zi múase gisaz,  
 gibót er, thaz sie sázin, mit imo al sáman azin.  
 Uvóla thaz githígini, thaz nóz tho thaz gísídili,  
 20 thia súazi sines múases! giuuerdan móhta sie thés.  
 Ni uuard io nihéin ezzan mit súlichen bisézzan,  
 noh disg in álahalbon, ni si áuur mit then sélbon.  
 Thár saz, míhil uuúnna, thiú éuuiniga súnna,  
 ni fon imo ouh ferron einlíf dágastérron:  
 25 Drúhtin selbo in uuára (uuaz zéllu ih thír es méra?)  
 ioh thie mit imo in nóte unarun uuállonte.  
 Sint sie úntar ménnisgon after góte fúriston,  
 in himilríche ouh, thaz ist uuár: thaz githífonotun se thar.  
 Írthífonotun se hártó fruma mánagfalto,  
 30 thia selbun éra, thih nu quád, ioh éuuiniga drútscaf.  
 Nu íst uns thiú iro gómaheit, so iz zen thúrfín gigeit,  
 zi gote uuégod hártó ioh thrato mánagfalto.  
 Ni múgun uuir, thoh uuir uuóllen, iro lób irzellen:  
 bí thiú fáhemes mit fréuuidu nu frámmort zi theru rédinu.

25 íoh ouh 28 tharmít ni uuári. 24, 1 tház 2 lémp 3 sar tharmítj 6 uuir  
 zi thiú bigínnen 7 huses 8 uuíht uuir iz gimáchon scóno 9 búrg in 11 iagi-  
 uuedar so 12 mán garauuz 13 iz zíoro stuolo 14 al gestin gízám 15 hartó  
 thar 16 se 17 gísáz 18 imo 20 thes 22 disg sj 23 sunna 24 ní imo ferron  
 einlíf dágastérron 25 Druhtin selbo 26 thie imo 27 furiston 28 himilríche  
 29 hartó 30 drútscaf 31 ist úns 32 hartó.